

INUIT ATAQATIGIIT

Inatsisartuni



UKA2019/Imm. 149

2. oktober 2019

Stine Egede

Politiit Paasiniaasartui (PET) pillugit inatsisip Kalaallit Nunaanni atulersinneqarnissaa pillugu peqqussummut missingiummut Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Nunarsuarmioqataajartornitta takussutissaasa ilagaat nunatta inuiassuarnit allanit aamma soqutigineqaleralluinnarnera. Isumannaallisaaneq annertuumik ukiuni kingullerni pingaartinneqaleriartortoq amerlasuujulluta misigisareerparput. Timmisartumimmi nunanut allanut angalaniarutta, atisaajanngisungaannarluta misissorneqartalerpugut. Nunanguarput toqqissisimaffipput, amerlanertigullu annilaanganata, ersinatalu najortuarsimasarput ajoraluartumik taamaattuaannartussaajunnaarpassipq.

Politiit sungiusimasavut, sutigut tamatigut amerlasuutigut naammagalugit ukiorpassuarni sullissisorisimasagut "naammakkunnaarsimapput", immikkullu piginnaanilinnit suliasat ilaat suliarisariaqalersimallutik.

Ullumikkut PET nunatsinni sulissaguni immikkut malitassat, justitsministereqarfiup ataani malitassiat aallaavigalugit sulisarput. Tamannalu immi ajunngikkaluartoq, illersorluarneqarnerusinnaanera eqqarsaatigalugu inissaminiippoq PET-ip sulinissaminut inatsisai naalagaaffiup iluani atortuusut atulersinnissaanut inatsit nunatsinnut aamma atuutilersinneqarpat.

Politiit nalinginnaasutut maleruagassanik malitassaqaraluarlutik 2014-imi immikkut inatsisunik malitassanik pilersitsivigineqarnikuupput. Taannalu Danmarkimi taamaallaat atuutuummat maanna nunatsinni atuutilersinnaanera matumuuna akuersinitsigut pilersissavarput.

Taannalu qulequttanut sisamanut pingaarnersiorneqarpoq: Siullertut; PET-ip suliai pillugit inatsisitigut malittarisassiorneq, annermik ullumikkut PET-imit suliasanut isumagineqareersunut naapertuuttoq. Aappaattut; PET-ip paasissutissanik katersisarnera, pissarsisarnera, ingerlatitseqqittarnera paaasarneralu pillugit inatsisitigut malittarisassiorneq. Pingajuattut; Isertortumik paasiniaasartunut nakkutilliusussanik arlaannaannulluunniit attuumassuteqanngitsumik pilersitsineq. Sisamaattullu; PET-imi paasissutissanik paasisaqarnissamut periarfissaqarneq.

PET pillugu inatsit Kalaallit Nunaanni pissutsit pissutigalugit allanngortinneqarluni Kalaallit Nunaannut atulersinneqassasoq missingiummi inassutigineqarpoq.

Inuit Ataqtigiinniit tamakkiisumik taperserlugu oqaatigissavarput.

Inuit Ataqtigiinni tama oqaaseqarluta siunnersuut ataatiimititaliamut susassaqtumut ingerlateqqipparput.